

NÓS ERMÔ JURAD – SERGIO FRUSONI

Luis Romano

Consul Honorário da Rep. de Cabo Verde no RJ

N'Era de 1975, espôs de temp-de-mund, m'tive sorte e ventura d'encontrá trovéz. Nós Ermô SERGIO FRUSONI, já mut doençad p'um molestra que leva'l pa Lisboa em cata de tratament.

Nós, dôs braçá na companher, derramad num tchôr de mut sentiment e qand le n'pude güentá tom de sê fála, m'intuí cmô quel'era noss' derradêr encontr na Terra. Despôs de tant an's t'escrevê un pa ôt, amoda ermô separad na poder de Força-Maôr, m'bem topá cum Fi-de-CABVERD tchô d'idêa pa levantá esprit e honrá nome de Nós Terra, infelizmente já pead na cama, onde Morte Natural bem besca'l, antes que'l tevesse recompensa de pudesse presenciá glóra de Dia de Nós Independença Nacional, pessoalmente.

Antô bem'l um pressentiment, e num desabaf desconsolad el confessá: – “Pena q'im tem é de morrê num terra strangêr!”

Passad dôs mês tchegá notícia de ter sid dad-a-terra esse Nós Companhêr e Camarada que foi na devêra Um-Fi-de-CABVERD, que mut lescrevê e tmá parte importante na fundament de Nós Letradura de Resistença.

S'algum dia alguem tiver ciencia e conciencia d'estudá obra de SERGIO FRUSONI, qand for detreminad sindicança d'assent de formaçõ – enformaçõ – informaçõ de Língua CABVERD, justiça ha-de ser fêr pa'da'l sê lugar merecid de Letrad Desbravador de Nós Idioma – Poeta de Pov – e Contador d'Estora.

Home lançad na Resistença escrevid e cantada SERGIO FRUSONI tmá nota de tud quêxa de Nós Pov, qu'el bem dexá marcad na maioria de ses brincadera post na boca de falar de Gente de Sam'cente. E só assim el pude passá de riba dum Sistema Garrotchad – daquês temp – pa bemsse vrá um sabid fazedor de Morrna e escrevedor de Nós Situaçõ Pertad, cada vez mas nas marrad na Destinaçõ de Nós Terra e Nós Gente ta clamá pa Liberdade Esperad dias há na mund.

Daquês |pôc que pressenti |Nôs Realidade na Letradura CABVERD, tive um temp que SERGIO FRUSONI fca el só, jurad na mō-de-palavra de |Nôs Cultura, ta tmá nota e cença de |Nôs Folklôr, t'escubri forma nova de |nôs manera d'entendê, seja escrevend Estora, seja faland na Radio, seja n'apresentaç de |Nôs Cantiga, sempre mantend sê posiçõ de Poeta e Home-de-Pov. L'foi um criatura simples, estimad com um verdadêr cristõ, mut vez esquecid, ma tchõ de confiança, sê vida intêr, na Linha dum Razõ Nacional onde ta sobressaí sê dedicaçõ pa sê Pov de CABVERD, qu'el ta cunecê miôr que ninguem, num qrimend dad e sentid.

S'um dia for escrevid Estora de Letradura CABVERD, um posiçõ d'honra e mereciment tem de ser levantad p'esse Poeta Ilhad, vident, trocista, que dá se capacidade d'artista pa dexõne participaçõ n'hardança e ajuda de formaçõ escrevid de |Nôs Linga, num temp que recourse era "Boca-Calad".

Marcad p'um sodade que fca'l de "Temp'intig", qand "NÓS TERRA ERA SABE" sê poesia d'evocaçõ e sentiment t'en fientá cara-cara Nôs-Marga-Vida, e, amoda um rosár de penitença, ta bem depó na Trubnal d'Injustiça tant cosa qu'el foi testemunha fiel e algemad pa razõ de Censura.

Daí sê manera de desconsolad, sem ser triste de natureza, t'esperá Promessa daquel Manhã que ja'l n'pude alcançá.

E pa compensá tant sofriment, SERGIO FRUSONI inventá desenfad na ses Contar, ta fazens arrí : qand el qria, principalmente n"ESTORA DE TI CARANGA" e ses piada de "MOSAICO MINDELENSE", aonde el foi descobard, pa fca na boca de Pov de CABVERD.

Send um Poeta/Music, ses Morrna e Coladêra inda ê uvid e cantad dentr'e fora de Nôs Terra. De tud e quant el escrevê, mut de sê obra t'y t'esperá vez de publicaçõ e gora c'apareciment de "VANGEL, CONTOD D'NÓS MODA" ta surdí mas um ajuda pa reforçá Letradura CABVERD hoj'em dia.

Nôs certeza-esperança é q'um Nova Dimensõ Cultural t'y ta desenvolvê na Nôs Terra, e q'um providença nacional tem de ser tmad p'Instruçõ colhetá esse hardança espaád, que SERGIO FRUSONI legõns cmõ prova de sê condiçõ de ser um Verdadêr CABVERD.

Nôs certeza é q'um dia Nôs Valor que foi marrad boca, um dia breve ta bem sentá na ses cant merecid e pertencid, já qu'ês tud foi companha na preocupaçõ d'esclarecê Nôs Pov pa tchegasse na Realidade Nacional.

Sem junta-mõ de Nôs Tud, n'Unidade p'aquíl qu'ê nôs pertença, um manera errad ta mantid sem razõ nem proveit geral.

Sem proveitament de nôs capacidade -- de tud forma -- nôs ta continuá ingnorad na Mund. Nôs ta continuá desarad na Mund e serví na Terrabaxe nôs prenda.

Sem conciença de Nôs Força Mental n'Arte e Ciença, tmad |pê na responsabilidade de Cada Um, tud e quant nō pensá fazê ta trazê dúvda de nōs serventia d'erguê na-devêra um Escola Livre de Cultura Caboverdiana. O que for ponderad têm de ser na mira de melhorá |Nôs Naçõ e sê raiz é p'entranhá na massa mas find de |Nôs Terra.

C'ajuda de |Nôs Letrad -- SERGIO FRUSONI foi exempl' -- ta levantad razõ d'importança e desenvolviment de |Nôs Linga Nacional, pa Família CABVERD ser mas grande e mas unid, tê nō tchegá na pont de fundá na Nôs Terra assent p'UNION CABVERD DE LETRAD. Antõ já ta podid orientá e publicá o que melhor foi escrevid, abrind esperança |p'aquês que t'y ta mostrá, na Letra, n'Arte e na Ciença, sê vocaçõ natural, já que fortuna de qualquer pov ta na Flôr d'Idade.

Ê na certeza de |nôs destinaçõ consciente, espelhad na luta daquês que sacrificá pa |Nôs Liberdade de nō ser mas Gent'ilhad, que TUD tem de ser possivel, se nōs pensá em derrotá o que foi julgad impossivel.

... e foi nesse conformidade que |nôs falá bastante sobre futur de |Nôs Terra, ta desejá um Vida Nova p'um Pov Nov, tê que tchegá hora de |nôs despedí.

Sergio Frusoni confessa-me, ága t'escorrê'l pa cara abaxe, ses dōs mō marrad na nhas mō e alma de ses õie pregad na mim: -- "M'sabía q'um dia nōs tinha de tormá encontrá! M'sabía! M'sabía!

E foi assim que nō desimpartá de companhêr, já que força faltõns pa continuá naquel troment que tinha de separá trôvez, dōs ermõ marcad pa mesma dōr antig.

M'saí pa rua, fet um desgraçad, inda ta roê-me quel olhar dum criatura dorad que nacê Poeta e que revelá'me, num instante sem fim, segrêd que gente humilde de nha camada n'tem condõ de contá pa ots.

Desse encontr' fecá-me consolança de ser despedid de Sergio Frusoni, antes de sê passament pa Mund-de-Verdade, vist que, certeza dessa viaja sem volta foi sê confissõ naquel moment impossivel de nos separaçõ final pa NUNCA MAS!

Obras de Sergio Frusoni:

"A Lingada" -- estora -- 1953.

"Mosaico Mindelense" -- cronica -- s/d.

"Postura de nha violõ" -- s/d.

"Stora, stora, virtud d'céu, amén" -- s/d.

"VANGEL, CONTOD D'NÓS MODA" -- poesia.

"Cuscuzada" -- folklor -- s/d.

"Sanvcênte já cabá na nada" -- poema -- s/d.

"Ó Maria Hortensa" -- mornna -- s/d.